



Geiq ndaej haujlai bi gaxgonq, ngoenzhaenx, aen mbwn banringz mongmoekmoek, mbouj miz saekdi rumz. Fwj goemz roengz daemqdetdet, lumjnaeuz yaek doek fwn. Couh lumj boux vunz ndeu yaek ae, hoeng, youh ae mbouj okdaeuj, mbaet youh nanz-souh raixcaix.

Gou simcingz mbouj sangi, ndawsim ceiq fanz cungj dienheiq neix bae okcai. Aenvih dwg baez daih' it bae ndaw singz hung camgya beiz-yinbanh hagsib Sawcuengh, swheij youh mbouj rox baezneix bae hag ndaej maz doxgaiq, gangj gij vah mbouj soh, lienz Sawcuengh dwg maz cih gou hix mbouj rox saek aen. Mboujguenj baenzlawz, cungj gihvei neix nanz miz, gou couh naengh ci bae hagsib lo.

Liz hai ci seizgan lij miz diemj lai cung, gou seizbienth swyouz cwxcaih menh byaij youq gwnz gvangjicangz, baenzneix muz seizgan.

"Goeng' au, hojlienx hojlienx gou ya, faen di ngaenz hawj gou ba." Aen sing he ciuyinx gou. Aen simhoz gou riengz sing muengh bae, yawjraen baihnaj goeng' au haenx miz laeq lwgnyez daenj buh leqlaengq he, faj fwngz ndaemndwt lumj nyauj yuih nei iet okdaeuj. Goeng' au haenx daenj geu buh cingh he, geu buh hausisi, vaq luemj yaebyaeb, de gipmuengz byaij roen, lau faj fwngz ndaemndwt

lwgnyez dongj buh de uq bae.

"Hojlienx hojlienx gou ba, gou sam ngoenz mbouj miz doxgaiq roengz dungx gvaq le, hawj maenz he hix goj ndaej." Ngeix daengz ndek mbouj doek laeq lwgnyez neix, goeng' au haenx cienq laeng hawj de geij coenz: "Deuz! Deuz! Deuz! Baenzneix iq couh rox okdaeuj guh seng' eiq!" Laeq lwgnyez haenx daengx roengzdaeuj, saetmuengh raixcaix.

Raen daengz neix, ndawsim gou gag ngeix naeuz: Dingqgangj seizneix cienmonz miz bang vunz baengh baenzneix liemx ngaenz gvaq ndwen-ngoenz. Gyoengqde itcig leihyungboux vunz miz doengzcingz, bik lwgnyez guh yiengh nyapnyuk cang gaujvaq daeuj yaeh cienz. Gangj mbouj dingh gyoengq vunz neix cingq ndwn youq gizgyawj yawj laeq lwgnyez neix, byawz rox gyoengqde dwg mbouj dwg bohme h laeq lwgnyez neix. Danghnaeuz lwgnyez liemx mbouj ndaej cienzngaenz cuk, dauqma aiq deng hut deng dub dem. Mboujguenj baenzlawz gangj, laeq lwgnyez neix caen hojlienx, aen nienzgeij neix bonjlaiz wngdang bae hagdangz doeg-saw, nyinhcaen hagsib, hoeng..... Gyoengq bouxlau sim doeg lai, mbouj soengq lwgnyez bae doegsaw hag cihsiz, hawj de daengzcog baenz boux vunz doiq sevei miz yungboux ndeu.

Gou cingq ngeixngvanh, laeq

lwgnyez byaij daengz baihnaj gou, mbe song faj fwngz ndaemndwt okdaeuj cam gou: "Dahcej simndei, hojlienx hojlienx gou ba, gou sam ngoenz mbouj miz naed haeux he roengz dungx gvaq, mwngz hawj maenz he hix baenz." Mboujguenj laeq lwgnyez neix caen dwg saedcej gungzhoj, roxnaeuz dwg yaeh vunz, ndawsim gou nanzgvaq baenzmaz. Gou dawz maenz ngaenz he okdaeuj, ndenq haeuj ndaw fwngz de bae. "Docih mwngz! Dahcej simndei! Hoh mwngz vunzndei seizheiq hix ndaej ndei!" Laeq lwgnyez neix byoem ndaem song da ndongqliklik, aen bak de caen rox gangj vah, hojsik aen ndang de uqnoeknoek, gou naemj de swheij hix lumz baezgonq swiq caemx dwg seizlawz lo.

Duzbid youq gwnz gofaex heuh-getget, dienheiq youh aeng youh ndat, lumj aen rae naengj ngaiznaengj nei. Gou mbouj nyienh bae ndaw cehcan caj ci, couh byaij haeuj aen diemqgaiva bae. Gou bingzciengz youq aen diemq neix cawx doxgaiq gvaq, dahgaiva roxnaj gou, gipmuengz gvaqdaeuj dongx gou. "Mwngz ndei, baenzneix mwngz yawj maz?" Dahgaiva roxsoq youh sing unq cam gou, de mbouj gangj "cawx maz", mienx ndaej yaek gaemh vunz cawx doxgaiq.

Seizneix, youq baihrog youh byaij haeuj daeuj boux vunz ndeu, gou raen boux vunz haenx cingq dwg laeq lwgnyez haxbaenh. De gig nyinhcaen dwk genj bog va gyaunde. "Mwngz yaek yawj maz?" Dahgaiva riunyumnyum cam naeuz, aiq de soqlaiz ngeix mbouj daengz laeq lwgnyez uq rox daeuj cawx va.

"Aeu bog vagut henjngingnging he!" Laeq lwgnyez neix hai bak naeuz.

"Yaek au dou soengq bae hawj byawz?"

"Mbouj yungboux, mwngz youq mbaw gaj baenzneix sij 'soengq hawj boux vunz gou ceiq gyaez'. Baihlaj sij 'hoh daxmeh ngoenzseng haengjheiq'

couh baenz."

"Itgungh 20 maenz ngaenz." Dahgaiva doq sij doq gangj.

Laeq lwgnyez neix daj ndaw daehbuh dawz aen daeh iq okdaeuj, boeg coq gwnz daiz, gij ngaenzdiq cungj muz ndaej ronghliklik. De geq ok 20 maenz okdaeuj, ngednged song fwngz ndaemndwt, caiq menhmenh ndenq hawj dahgaiva. Doeklaeng ciepaeu bog vagut henjngingnging hoij miz gaj sij saw, cienq ndang lizhai aen diemq gaiva byaij lo.

Laeq lwgnyez neix lij rox cawx va bae hoh daxmeh de, neix dwg gou baenzlawz cungj ngeix mbouj daengz.

Yaek daengz seizgan fat ci lo, gou ok diemqgaiva daeuj, baihrog cingq doek fwn, gwnz roen mbouj miz geij boux vunz byaij loh, miz gak cungj gak yiengh ci baebae dauqdauc. Sawqmwh, gou muengh raen laeq lwgnyez haxbaenh, raen de gawqyienx mbouj goq ndang deng fwn rwed, ndaw fwngz rop bog vagut, siujsim yupyup baez yamq baez yamq menhmenh byaij dwk. Ndag iquetet de engq yienj ndaej nyieg, bog vagut henjngingnging ndaw fwngz de lumj youq ndaw fwnrumz engq henj lo.

Gou hwnj ci lo, ci yied hai yied vaiq, bak aek gou hix lumjnaeuz deng maz doxgaiq dub baez he nei, lwgda gou yawj mbouj raen cingcuj lo.

Gvaq baezhaenx le, gou moix baez okcai dauqma ranz, ngeih vah mbouj gangj, couh bae haw cawx doxgaiq bae ranzdaiq yawj daxmeh gou. Geiq ndaej bineix ngux nyied co' ngux, gou cawx duz gaeq cug he bae ranzdaiq yawj daxmeh gou, caemhcaiq hai soujgih okdaeuj hawj daxmeh gou caeuq dahnuegx youq Gvangjdungh guhhong sibinz gangjgoj, gou yawjraen faj naj daxmeh gou hai lumj duj va lengi nei, gwnz naj de youh lai gya miz geij sai nyaeuq lo. Gou ndomq ndaej baenzneix cingcuj, daxmeh laux lo, seizneix ndaej raen lwgnyez beij dawz ngaenz hawj de lij vuenyungz.

Geiqniemh Gaijgwz Hailangh 40 Bi

纪念改革开放四十年

□ Veiz Liujgiz / 韦柳菊

Youq Cunguek Gungcanjdangj lingjdauj baihlaj, guek raeuz gaijgwz hailangh gaenq ndaej 40 hopbi lo. Youq 40 bi neix gvaqdaeuj, gij ndaw singz lajmbanj raeuz bienqvaq gig hungmbwk.

Hawsingz bienq ndaej gyaunde. raixcaix, gyauhdungh seizneix bienhleih lai lo, bae daengz gizgyae cungj mbouj au geij nanz. Lumj gaxgonq bae daengz rogguek, roxnaeuz guek raeuz baihnaz baihaek, cungj au geij ngoenz bae, hoeng gaijgwz hailangh le, guek raeuz fazcanj lo, caiq mbouj yungboux baenz nanz bae daengz gizdieg lo.

Lajmbanj hix miz bienqvaq lo. Seizneix lajmbanj coih roen ndei lo,

bae daengz ndaw yienh ndaw singz hix gig yungzheih. Lij geiq mwh gou lij iq, lajmbanj ranzranz gig hoj, mbouj miz geij donq noh gwn, lwgnyez mbouj miz geij geu buh, geu buh ndeu dahcej daenj mbouj hab le, youh hawj geij boux nuengx daenj. Ndwen mbouj ndaej daiq lwgnyez bae saek baez haw, couhcinj bae haw hix mbouj fuengbienh, gij roen lajmbanj cungj dwg gumz gumz gamxgamx, hoj byaij dangqmaz.

Hoeng, gaijgwz hailangh 40 bi gvaqdaeuj, beksingq swngghoz bienq ndei lo, caiq mbouj lumj gaxgonq nei. Gou vih guek raeuz gaijgwz hailangh ndaej fazcanj cibfaen angqyangz.

Gaijgwz hailangh 40 bineix, guek

raeuz hix bienq ndaej yied daeuj yied hungmbwk fanzyungz lo. Gaxgonq gohgi mbouj fatdad, cungj deng bouxwnq hangz. Doeklaeng guek raeuz haenqrengz gaenx guh bae hag, bae yenzgiu, cungj cau ok baenzlai feihgih, daihbauq, hangzmuj, hojcen daengj gak cungj gak yiengh doxgaiq, caiq mbouj lau ciengzseiz deng vunz hangz lo.

Guek raeuz fazcanj baenz hung le, couh yied daeuj yied yawj naek gohgi hwng guek, yinzcaiz giengz guek lo. Bohme lij iq seiz geij beixnuengx cungj mbouj ndaej doegsaw caez, cij miz saek boux roxnaeuz song boux ndaej bae doegsaw, danhseih mbouj doeg ndaej nanz, cij doeg daengz

siujyoz couh mbouj ndaej mbouj dauqma lo. Aenvih ndawranz gungz-hoj, mbouj miz ngaenz hawj doeg lo. Seizneix raeuz vuenyungz lai lo, bouxboux lwgnyez cungj ndaej doeg daengz gouj nienzgaep, danghnaeuz bouxlawz miz naengzlig, lij ndaej doeg daengz gauhcungh, dayoz caeuq engq sang dem.

Raeuz seizneix lwgminz swngghoz caen bienq ndei lo, bouxboux cungj caencaen yiengjsouh daengz gij ndeicawq gaijgwz hailangh lo, gou gyo' mbaiq gou seng youq guek raeuz seizneix, caemh gyo' mbaiq dangj raeuz caeuq guek raeuz, muengh guek raeuz yied daeuj yied hwngvuengh fanzyungz!